



## La plej gravaj momentoj de la kubaj esperantistoj en 2018



La jaro 2018 markis gravajn momentojn por la kuba kaj la internacia esperanto-komunumo: jen resume versio de kelkaj el la plej gravaj kunvenoj organizitaj de la kuba esperantistaro, plus aliaj, kiuj havis partoprenon de kubaj esperantistoj.

### **9-a Tutamerika Kongreso de Esperanto (#9TAKE): februaro**

Ĝi okazis de la 11-a ĝis la 17-a de februaro kun partopreno de 231 kongresanoj el 20 landoj. La inaŭgura ceremonio okazis en la teatro de la nacia muzeo de belartoj. La vicministro de kulturo, Fernando Rojas bonvenigis la partoprenantojn.

La kongresa temo estis “Lingvoj kaj Kulturoj: edukado por daŭripova evoluo en La Amerikoj”. Ĝi konfirmis ke Kubo estas paca kaj sekureca loko kie solidaremo kaj amikemo estas realaj kaj kongruaj al la celo de la internacia esperanto-movado.

La kongreson partoprenis la d-rino. Sara Spanó, estrarano de UEA kiu esprimis sian dankon al la kuba movado pro la aktiva agado favore al Esperanto. La ĉeestantoj povis ĝui tre varian programon, prelegojn, kunsidojn, fakajn prezentojn, lecionojn, AMO-seminaron, kulturen programon, kiu inkluzivis teatraĵojn amatorajn kaj ankaŭ profesiajn, ekskursojn antaŭ kaj postkongresajn.

La antaŭ-dum kaj postkongresa informa agado inkluzivis radiajn kaj televidajn



---

elsendojn en la naciaj kanaloj, ciferecaj raportoĵoj en lokaj gazetoj plus aktiva interŝanĝo en la socia reto Fejsbuko.

### **Krisolaj Esperanto-Tagoj (KET): majo**

Okazis de la 23-a ĝis la 27-a de majo por la unua fojo. Temis pri regiona renkontiĝo, kies nomo devenas el la nacieca rolo kiun plenumas la bela kaj historia urbo Bajamo, situanta en la orienta provinco Granma.

La eventon organizis la provinca filio de KEA sub la gvido de Frank Cedeño kaj lia teamo, kiu proponis interesan programon sub la temo **Identeco kaj estonteco de Esperanto**. Pri tiu ĉi evento en la krisoluĝo de la kuba nacieco, indas menciigi ke ĝin partoprenis ĉirkaŭ 40 geesperantistoj el diversaj provincoj. La sidejo de la evento estis la kulturcentro *La fenestro* situanta en la urba bulvarado.

### **39-a fondodatreveno de KEA: junio**

La 16-an de junio Kuba Esperanto-Asocio festis sian 39-an datrevenon kaj agotagon de esperanto en Kubo. Sendube temis pri festinda dato kiu estis uzita por kunvenado kaj informa agado je loka agado.

La nuna Kuba Esperanto-Asocio naskiĝis, ĝuste la 16an de junio de la jaro 1979, de post multa sindediĉo kaj tenaceco de niaj antaŭuloj.

### **Universala Kongreso de Esperanto en Lisbono: julio**

La 103-a eldono de la UK, la plej tradicia kaj amasa evento de la esperanto-komunumo okazis por la unua fojo en la portugala ĉefurbo.

La UK okazis inter la 28-a de julio kaj la 4-a de aŭgusto kun partopreno de 1567 delegitoj el 73 landoj. Ĝia temo estis "Kulturoj, lingvoj, tutmondiĝo: kien nun?".

La kongreso per fina deklaro alvokis la aktivulon de Esperanto praktiki la solidarecon al suferantoj, batali kontraŭ ĉiuspecaj diskriminacioj, interalie, kongrue kun la plej noblaj tradicioj de la internacia esperanto-movado.

Ĉe la retpaĝo de UEA troveblas pli detalaj informoj: [www.uea.org](http://www.uea.org)

KEA estis reprezentita en Lisbono ne nur en la komitato, sed ankaŭ aliĝis individuaj esperantistoj kiuj partoprenis la kongreson. Indas menciigi ke UEA rekonis la elstaran agadon de KEA kaj RHK en la persono de Maritza Gutiérrez González, ankaŭ multjara aktiva membro kaj komitatano de la internacia asocio esperantista.

### **30-a jubileo de Radio Havano Kubo: septembro**

La 11-an de septembro la esperanto-elsendoj de RHK fariĝis 30-jaraj, kio estis prifestita kun la geaŭskultantoj ankaŭ en Lisbono kadre de la kunsido kun la radioaŭskultantoj, per intervjuoj kaj amikaj mesaĝoj.

Aliflanke, KEA kaj RHK kune realigis radioelsendon en la radia revuo Cuba Online.



La elsendo ankaŭ estis vive elsendita per la socia reto Facebook, la 11-an de septembro. Multaj geaŭskultantoj kaj amikoj sendis mesaĝojn kaj bondezirojn al la tuta teamo de la radiostacio.

La estraroj de ambaŭ institucioj kunvenis en amika etoso, en la sidejo de la radiostacio kaj esprimis sian volon daŭre kunlabori por ke Radio Havano Kubo plu estu la esperanta-voĉo de Kubo. Rekonatestiloj estis interŝanĝitaj kiel esprimo de tiu agnosko al la reciproka kontribuo.

### **Junulara renkontiĝo (JUSKA): oktobro**

En la jaro 2018 grupo de kubaj gejunuloj, sub la gvido de la junulo Lázaro Ochoa, komisiite de KEA, entreprenis diversajn agadojn kun la celo revigligi kaj restarigi la junularan sekcion de la asocio. Ili reprenis la ideon okazigi la iaman junularan someran renkontiĝon (Juska). Post kelkmonata preparado la renkontiĝo okazis de la 11-a ĝis 15-a de oktobro en kampadejo nomata La Sierrita, feriejo situanta en la orienta provinco Granma.

La junaj esperantistoj sin proponas novaj celoj por revigligi la junularan sekcion kaj varbi gejunulojn en la tuta lando.

### **Zamenhofa Metiejo en Guantánamo: decembro.**

Ĉi-foje ĝi okazis de la 12-a ĝis la 15-a de decembro ĉe la marborda feriejo konata kiel *Yacabo*. Tie ariĝis ĉirkaŭ 60 esperantistoj el la tuta lando por kunfesti la zamenhofan tagon.

Unu el la partoprenantoj de tiu ĉi tutlanda renkontiĝo, estis Pedro Fernández, estrarano de KEA. Li raportis ke la evento estis bone organizita kaj havis varian programon kun prelegoj, lecionoj, didaktikaj ludoj, promenadoj kaj kulturaj vesperoj.

La Zamenhofa Metiejo havas pli ol 22-jaran tradicion kaj estas organizita de la provinca grupo de Esperanto, kiun gvidas Tirso Ávila kun la aktiva partopreno de la tuta teamo provinca.

### **Zamenhofa Tago kaj Jarfina Aranĝo: Esperanto-centro Havano**

La 21-an de decembro okazis la jarfina tradicia renkontiĝo en la nacia sidejo de KEA en Havano, tio estas, la Esperanto-centro, kie ariĝis proksimume 50 geesperantistoj por kunfesti la zamenhofan tagon kaj kune vespermanĝi.

Kiel unua programero okazis prezento pri **La Unesko-rezolucioj de Esperanto** flanke de Juan R. Rodríguez, estrarano kaj historiisto de KEA. Poste sekvis eta revuado pri la jara agado, deklamado kaj kanto. Krome, estis jam anoncita ke la 40-a jubileo de la asocio estos solene festita en 2019 en salono de La Kapitulo de Havano, kie okazis la fonda solenaĵo en 1979.

Same oni invitis la kubajn esperantistojn aliĝi al la jara renkontiĝo KERo 2019 okazonta de la 21-a ĝis 25-a de marto 2019 en la kampadejo La Hirundoj, feriejo



---

situanta en la orienta provinco Santiago de Kubo.

## **Santo Domingo en la centra regiono**

(Laŭ raporto sendita de José Luis Montes de Oca, Prezidanto de la E-Grupo de

Santo Domingo)

La esperanto-movado en Santo Domingo, provinco Villa Clara, jam ekzistanta de



la jaro 1987, vige laboris dum la jaro. La 29-an de decembro ili okazigis la

Ĝeneralan Asembleon por analizi la Jaran Raporton pri la agado de 2018, kiu

estos prezentata en la Nacia Komitato venontmarte.

La kunvenon partoprenis la membroj de la E-Grupo, plus reprezentantoj de la



Esperanta Grupo de Santa Clara, la Direktoro pri Kulturo en Municipa Instanco kaj

laboristinoj de la loka Muzeo kie ili kunvenis.

Sekve, la partoprenantoj vizitis la Domon de Geinfanoj sen gepatra prokjektado kaj

kunportis donacon nome de la Esperanta-movado. Estis bela renkontiĝo kun



geinfanoj, gelaboristoj de tiu humanitara institucio. Infano kantis e-kanzonon kaj

estiĝis tre kortuŝa etoso.

Poste la esperantistoj plus invititoj renkontiĝis ĉe esperantista domo kaj ĝuis

distran aranĝon kiel adiaŭa festo jarfina de 2018 kaj prepare al novaj taskoj en



2019 por fortigi la lokan agadon en la centra regiono de Kubo.

Raporto verkita de:

Maritza Gutiérrez González

(Fonto: el la arkivoj de Radio Havano Kubo en Esperanto kaj Kuba Esperanto-Asocio)





**RADIO HABANA CUBA**

Artículo Editado por Maritza Gutiérrez González  
01/01/2019 12:52:57

---